



Co respaldo da Consellería de Política Social, a organización humanitaria e a operadora galega están a percorrer localidades das 4 provincias para ofrecer os seus “menús tecnolóxicos”

Cruz Vermella e R chegan a Viveiro, Sarria e Monforte con “Enredando *tour* R” para integrar persoas maiores na contorna dixital

- ***A aula móbil do programa instalarase a semana que vén nas urbes lucenses para “enredar” persoas maiores no mundo dixital dunha maneira lúdica, ofrecéndolles a degustación dun “menú tecnolóxico” á súa medida.***
- ***“Enredando *tour* R” presentouse este luns na Coruña e xa visitou Cedeira; a semana que vén estará en Viveiro, Sarria e Monforte e seguidamente farao noutras localidades de Ourense e Pontevedra.***

Venres, 17 de setembro de 2021.- Tras a súa presentación este luns na Coruña, a aula móbil formativa de “Enredando *tour* R” recalou hoxe en Cedeira e chegará o luns 20 a Viveiro para desprazarse o martes 21 e o mércores 22 a Sarria e Monforte respectivamente. É o momento das localidades lucenses, onde se instalará a aula formativa do *tour* para desenvolver esta actividade que procura a ‘inclusión dixital’ das persoas maiores.

Que a fenda non deixe ninguén atrás

A intención primeira desta acción é minorar o efecto da fenda dixital que tanto lles afecta a unha gran porcentaxe das/dos maiores e a outros colectivos vulnerables. Falamos de persoas que, por exemplo, durante o confinamento e nos momentos máis duros da pandemia, non puideron botar man das novas tecnoloxías para completar xestións esenciais como pedir unha cita médica, facer a compra ou realizar unha operación bancaria sen saír da casa.

R e Cruz Vermella teñen claro que o máis importante é que as persoas maiores lles **perdan o medo ás novas tecnoloxías** e desenvolvan habelencias básicas que lles permitan avanzar e aprender a navegar por internet, ter unha conta de correo ou enviar unha mensaxe. E, sobre todo, que non se sintan sós/soas e vexan que persoal especializado e persoas voluntarias de Cruz Vermella lles darán o apoio dixital que precisen *in situ*, no espazo das formacións, e que poden recibir asesoramento a través da páxina enredando.gal, creada especificamente para completar esta acción didáctica dedicada a elas e eles.

Menús formativos (para todos os gustos)

O programa desenvólvese nunha aula móbil con contidos formativos vinculados ás novas tecnoloxías. Unha furgoneta superequipada transporta os *smartphones*, portátiles, tabletas, altofalantes intelixentes... e todo tipo de accesorios para facilitar ese achegamento á realidade da tecnoloxía máis doméstica e presente en multitude de áreas da nosa vida cotiá.

As persoas que participen poderán fedellar mentres ‘degustan’ un dos catro “menús formativos” que Cruz Vermella e R lles teñen preparado para que elixan o que máis se adapte ás súas necesidades.

En función deses menús, en horario de 10:00 h a 14:00 h, impartiranse nas zonas escollidas de cada localidade 8 talleres (2 por menú) de 45 minutos cada un. Ao ser en espazo exterior instalaranse unhas carpas para o desenvolvemento da actividade e cumpriranse escrupulosamente as esixencias sanitarias e medidas anti COVID-19 para garantir a seguridade de todo o mundo e en todo momento.

Estas son as localizacións exactas das tres localidades da provincia de Lugo ás que chega o *tour* a semana que vén:

_ **Viveiro:** Xardíns Noriega Varela. Luns, 20 de setembro.

_ **Sarria:** Sociedade Recreativa *La Unión*, (rúa Matías López, 19). Martes, 21 de setembro.

_ **Monforte:** Rúa Cardeal. Mércores, 22 de setembro.

E esta é a carta de “Enredando *tour R*”, cos seus 4 menús:

_ **“Vivo no mundo analóxico, rapaza”;** menú básico para comezar a “enredar”

_ **“E ti... de quen vés sendo?”:** para saber que é e como funciona o *WhatsApp*.

_ **“Dixitalízate, ho”:** para aprender como se pode acceder ao SERGAS, ao banco, facer a compra e, en xeral, como xestionar o máis cofián por internet.

_ **“Menú R: móbilR”:** para coñecer a factura electrónica e outras utilidades e aplicacións prácticas en internet

Dende A Coruña ata A Guarda

Tras o seu paso pola Coruña, Cedeira e, a semana próxima, Viveiro, Sarria e Monforte, a aula móbil percorrerá seguidamente ata o 6 de outubro outras localidades galegas: O Carballiño, Verín e O Barco de Valdeorras, en Ourense; e Lalín, Pontearreas e A Guarda, en Pontevedra.

Para participar nas actividades de “Enredando *tour R*” as persoas interesadas poden chamar ao teléfono gratuíto 900 825 030 ou escribir un correo electrónico a galicia@cruzroja.es.

Sobre “Enredando”, de Cruz Vermella Galicia

“Enredando *tour R*” enmárcase dentro do proxecto “**Enredando**” de Cruz Vermella, cuxo obxectivo xeral é reducir a fenda dixital entre a poboación que atende a Organización na nosa comunidade autónoma. Trátase dun proxecto de capacitación dixital que xorde para evitar procesos de exclusión social por motivos económicos, de xénero, de idade, nivel educativo ou zona de residencia, entre outros.

“Enredando *Tour R*” é a primeira das grandes accións deste proxecto que se pon en marcha e que aposta por apoiar as persoas maiores e sensibilizalas no uso das tecnoloxías, así como axudalas a derrubar os temores e inseguridades que poidan ter ao respecto.

comunicación Cruz Vermella

687 419 397

lofreco@cruzroja.es

www.cruzvermella.gal

comunicación R

prensa@mundo-r.net

R.gal

